

**UKA 2017/106: Uunga siunnersuut: Kommunit aqunneqarnerat pillugu Inatsisartut  
inatsisaat nr. xx, xx. xxx 2017-imeersoq.**

**pillugu**

**Inatsisinut Ataatsimiititaliap**

**siunnersuutip aappassaaneerpeqarneranut**

**ISUMALIUTISSIISSUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Debora Kleist, Inuit Ataqtigiit, Siulittaasuugallartoq  
Inatsisartunut ilaasortaq Pitsi Høegh, Siumut, ataatsimiititaliami sinniisoq, Siul. tull.  
Inatsisartunut ilaasortaq Laura Táunâjik, Siumut  
Inatsisartunut ilaasortaq Iddimanggiu Bianco, Inuit Ataqtigiit  
Inatsisartunut ilaasortaq Per Rosing-Petersen, Partii Naleraq

**1. Inatsisinut Ataatsimiititaliap siunnersuummik suliaqarnera**  
Inatsisinut Ataatsimiititaliap siunnersuummik suliaqarnermini KANUKOKA-miit  
aallartitanik sassartitaqarfigineqarpoq.

Inatsisinut Ataatsimiititaliap, paasissutissat kaammattuutillu KANUKOKA-mit  
ataatsimiititaliap tigusal tunngavigalugit Naalakkersuisut apeqqutinut arlalinnut  
akissuteqaqqullugit qinnuigivai. Ataatsimiititaliap apeqqutai Naalakkersuisullu akissutaat  
isumaliutissiissummut uunga ilanngussaq 1-itut 2-tullu akkiunneqarput.

Aammattaaq Kommuninut, Nunaqarfinnut, Isorliunerusunut, Attaveqaqatigiinnermut  
Ineqarnermullu Naalakkersuisup Avannaata Kommuniani Ikaarsaarnermut  
Ataatsimiititaliamit saaffiginnissut pillugu ataatsimiititaliap assilisakkut ilisimatissimavaa,  
tassani inatsisissatut siunnersuutip allanngortinneqarnissaa Ikaarsaariarnermut  
Ataatsimiititaliamit kaammattuutigineqarsimalluni, taamaalillutik illoqarfinni kommunit  
ingerlatsiviisa qullersaqarfigisaanni aamma najukkami ataatsimiititaliat  
pilersinneqarsinnaalersillugit.

Naalakkersuisup tamanna tunngavigalugu illoqarfinni kommunit ingerlatsiviisa  
qullersaqarfigisaanni najukkami ataatsimiititaliat pilersinneqarsinnaanngortinniarlugit

inatsisissatut siunnersuutip allanngortinneqartariaqarsinnaanera isumaliutigequllugu Inatsisinut Ataatsimiititaliaq qinnuigaa.

## **2. Siunnersuut pillugu**

Siunnersuutip kommunit aqunneqarnerat pillugu Inatsisartut inatsisaat maanna atuuttoq taarserpaa, taamaattorli tassunga sanilliullugu allannguutininik ataasiakkaannguanik nassataqarluni.

### **2.1. Kommunalbestyrelsit**

Qaasuitsup Kommunian 1. januar 2018-imiit Kommune Qeqertalimmut (Kujallertut) kiisalu Avannaata Kommunianut (Avannarlertut) avinneqassaaq. Siunnersuutip nassataraa Kommune Qeqertalimmi kommunalbestyrelsip 15-it pallillugit ilaasortaqaalerneru (tamanna aamma Qeqqata Kommunianut Kommune Kujallermullu atuuppoq), Avannaatali Kommuniani kommunalbestyrelsimut ilaasortat 17-it pallillugit amerlassuseqassapput.

Kommunini taakkunani marlunni kommunalbestyrelsinut ilaasortat amerlanerpaagunik taamaalillutik katillutik 32-inik amerlassuseqassapput, tassa kommunit avinneqanngikkallarnerannit aqqanilinnik amerlanerullutik.

Siunnersuutip illuatungaaticut Kommuneqarfik Sermersuumi kommunalbestyrelsimut ilaasortat amerlanerpaaffissaat ullumikkut 21-iugaluartut 19-inngorlugit ikilissavai.

Inatsimmut nassuiaatini tamatumunnga pissutaasoq erseqqinnerusumik nassuiarneqanngilaq. Kommuneqarfilli Sermersooq qinersivimmi maanna atuuttumi Inatsisinut Ataatsimiititaliap paasinninnera malillugu 19-inik ilaasortalimmik kommunalbestyrelseqarnissani toqqarsimavaa, tassa malittarisassaticut ullumikkut atuuttutigit aalajangersarneqarsimasunit amerlanerpaaffissaminnit marlunnik ikinnerullutik. Inatsisinut Ataatsimiititaliap paasinninnera malillugu najukkami ataatsimiititalianut pilersinneqarsimasunut aningaasaliissutissat ilaannik kommunalbestyrelsimut ilaasortat ikilinerisigit, taamaalillunilu kommunip aningaasarsiarititaasunut aningaasartuutaasa tamarmiusut killilersimaarnerisigit pissarsinissaq kissaataasimavoq.

Kommuneqarfilli Sermersuup tusarniaanermut akissummini maannakkut amerlanerpaaffissaliussap attatiinnarneqarnissaa kissaatigisimavaa.

### **2.2. Najukkani ataatsimiititaliat**

Pinngitsoorani najukkami ataatsimiititalianik pilersitsisoqartalissaaq



Illoqarfinni kommunip ingerlatsiviata qullersaqarfiginngisaani kommunalbestyrelsip pinngitsoorani najukkami ataatsimiititalianik pilersitsisalnissaa siunnersuutip nassataraa.

Immikkoortoq 1-imi oqaatigineqareersutut Naalakkersuisup Avannaata Kommuniani Ikaarsaariarnermut Ataatsimiititaliap saffiginnissutaa tunngavigalugu Inatsisinut Ataatsimiititaliaq qinnuigaa illoqarfinni kommunit ingerlatsiviisa qullersaqarfigisaanni najukkami ataatsimiititaliat pilersinneqarsinnaangortinniarlugit inatsisissatut siunnersuutip allanngortinneqartariaqarsinnaanera isumaliutigeqqullugu

Malittarisassat ullumikkut atuuttut malillugit najukkami ataatsimiititaliamik pilersitsisinnaaneq kommunimut periarfissaavoq, taamaattorli pinngitsoorani pisussaaffiunani.

Inatsisinut Ataatsimiititaliap maluginiarpaa KANUKOKA-p, Kommune Kujalliup kiisalu Qeqqata Kommuniata tusarniaanermut akissuteqaamminni kaammattuutigigaat kommunalbestyrelsit najukkani ataatsimiititalianik pinngitsooratik pilersitsisussaatitaassanngitsut taamaattorli periarfissaq attatiinnarneqassasoq.

Tassunga atatillugu KANUKOKA-p tikkuarpaa kommunimi immikkoortut tamarmik kommunalbestyrelsimut aallartitaqarnissamut nunap immikkoortuanit kommunalbestyrelsimut ilaasortaataqartarnermut malittarisassatigut atuuttutigut qulakkeerunneqareersut.

Suliassiissutigineqartut pinngitsooranilu aningaasanik najukkami ataatsimiititaliat nammineerlutik atorsinnaasaannik immikkoortitsineq

Siunnersuutikkut nutaatut kommunalbestyrelsit pinngitsooratik aningaasanik najukkani ataatsimiititaliat nammineerlutik atorsinnaasaannik immikkoortitsisussanngortinneqarput. Aningaasat tamanik tusarniaanernut, kultureqarnermut, timersornermut susassareqatigiillunilu sammisassaqtitsinernut atorneqartassapput.

Kommunalbestyrelsit tamatuma saniatigut suliassanik aalajangersimasunik najukkami ataatsimiititalianut suliassiinnaapput, soorluttaaq najukkami ataatsimiititaliat kommunalbestyrelsinut kommunalbestyrelsimilu ataatsimiititalianut ataasiakkaanut siunnersuisutut atuuffeqarsinnaassasut.

Inatsisinut Ataatsimiititaliap maluginiarpaa najukkami ataatsimiititalianut tunngatillugu malittarisassanik atuuttunik allannguisinnaanermut apeqqutip kinguartinneqarnissaa KANUKOKA-mit kissaatigineqartoq, taamaalilluni KANUKOKA-p ataatsimeersuarnerani tullermi apeqqut pillugu isummernissamut KANUKOKA periarfissinneqarluni.

Naalackersuisut tassunga tunngatillugu oqaatigaat inatsisissatut siunnersuut KANUKOKA-mut kommuninullu tusarniaassutigineqareersoq, Naalackersuisullu tamanna tunngavigalugu allannguutissat siunnersuutigineqartut kinguartinneqarnissaannut tunngavissaqarsorinngikkaat.

Najukkami ataatsimiititalianut ilaasortat aningaasarsiaqartitaanerat

Kommunalbestyrelsit Naalackersuisunit amerlanerpaaffissiissutitut aalajangersarneqartunit najukkami ataatsimiititaliani ilaasortanut aningaasarsiaqartitsisinnaapput. Amerlanerpaaffissaliineq taanna ullumikkut ukiumut 74.000 kr-inut aalajangersarneqarsimavoq, tassalu Borgmesterimut aningaasarsiaritinneqartup aqqaneq marlorarterutaa (1/12).

Aningaasarsianut amerlanerpaaffissaliinerup taassuma qanoq naapertuutsigineranut apeqqutaavoq atuuffiup qanoq suliassanik nammakkiiviutiginera. Najukkami ataatsimiititalianut ilaasortat qanoq suliakkersorneqartiginerannik paasissutissanik Inatsisinut Ataatsimiititaliaq tigummiqaqngilaq. Najukkamili ataatsimiititaliamut ilaasortap piareersaateqarneq ilanngullugu sapaatip akunneranut annerpaamik nalunaaquttap akunnerini pingasuni sulisartoq naatsorsuutigigaanni, taava aningaasarsiarititit amerlanerpaaffissaminniitinneqarnerat aallaavigigaanni nalunaaquttap akunnermusiaq minnerpaamik 474 kr-iussaaq.

Katitigaaneq

Inatsisissatut siunnersuutikkut najukkani ataatsimiititaliani ataasiakkaani ilaasortat qassiunissaat kommunalbestyrelsimut namminerumut aalajangigassanngortinneqarpoq. Taamaallilluni najukkami ataatsimiititaliani ataasiakkaani ilaasortat amerlanerpaaffissaannik inatsisissatut siunnersuutikkut aalajangersaasoqangilaq, tamanna nunaqarfimmi aqutsisunut atuuttoq assignagu.

Inatsisissatut siunnersuummi §32 imm. 2, najukkani ataatsimiititalianut qinersisarnernut tunngasoq, qanoq innuttaasut najukkami qinersinikkut kikkut najukkami ataatsimiititalianut ilaasortaanissaannik aalangiisussaannerannik – imaluunniit ilaasortat kommunalbestyrelsimut toqqarneqartussaannerinik nalornilersitsivoq.

Inatsisinut Ataatsimiititaliap paasinninnera malillugu najukkami innuttaasut akornanni qinersisoqartarnissaa siunertaasimavoq.

Pinerluuteqarsimanerumut pineqaatissinneqarsimaneq akiliisitaasussanngortinneqarsimanerluunniit pissutigalugu inuup kommunalbestyrelsimut



ilaasortaaginnarnissamut naleqqukkunnaartut nalilerneqarluni qinigaasinnaanerup annaaneqartarneranut malittarisassat najukkami ataatsimiititalianut ilaasortanut atuutinnngillat. Taamaalilluni inuk assersuutigalugu pinngitsaaliilluni atoqateqarsimanerumut imaluunniit peqquserlunnerumut pineqaatissinneqarsimasoq kommunalbestyrelsimut imaluunniit nunaqarfimmi aqutsisunut ilaasortaasinnamut naleqqukkunnaarsimasoq najukkami ataatsimiititaliamut ilaasortaasinnanerminut mattunneqanngilaq – tamanna naak inatsisissatut siunnersuutikkut najukkami ataatsimiititaliat nunaqarfimmi aqutsisunut piginnaatitsissutigineqartut assipaluinik piginnaatitaaffilerneqartut.

### **2.3. Nunaqarfinni aqutsisut**

Siunnersuutip aamma nutaatut aningaasanik nunaqarfimmi aqutsisut nammineerlutik atugassaannik kommunalbestyrelsit immikkoortitsisussanngortippai. Aningaasat kulturimut inunnillu qaammarsaanerumut, timersornerumut tunngasunut, teknikikkut ingerlatsivinnut pilersuinerumullu, najukkami inuutissarsiutinut tunngasunik suliniutinut imaluunniit susassareqatigiilluni sammisaqarnernut atorineqassapput.

Nunaqarfimmi aqutsisut maannakkutuut nunaqarfimmi pissutsit pillugit kommunalbestyrelsimut inassuteqarsinnaapput, soorluttaaq kommunalbestyrelsit maannakkutuut sapinngisaq naapertorlugu pissutsit nunaqarfimmi atuuttut (nunaqarfimmilu aqutsisunut namminernut aalajangigassanngortinneqarsimannngitsut) tamaasa pillugit nunaqarfimmi aqutsisut oqaaseqaataannik pissarsiniarsinnaasut.

Inatsisinut Ataatsimiititaliap maluginiarpaq kommunalbestyrelsit nunaqarfimmi aqutsisunut atugassiissutissanik immikkoortitsisalernissamut inatsisissatut siunnersuutikkut pisussaaffilerneqarnerat, suliassaqaarfiillu suut nunaqarfimmi aqutsisunut ingerlatassanngortinneqarnissaat kommunalbestyrelsinut namminernut aalajangigassanngortinneqarnerat KANUKOKA-mit ajornartorsiutitut nalilerneqartoq. Taamaalilluni nunaqarfimmi aqutsisunik piginnaatitsinerup aningaasaliinerullu ataqatigiinnissaat inatsisissatut siunnersuutikkut qularnaarneqanngilaq.

Inatsisinut Ataatsimiititaliap Naalakkersuisut tamatumunnga oqaaseqaataat pissarsiaraa. Naalakkersuisut akissumminni paasissutissiissutigaat nunaqarfimmi aqutsisut atuisinnaanerumut piginnaatitaaffilerneqarsinnaanerannut, siunertanut inatsisissatut siunnersuutikkut aalajangersarneqartunut aningaasanik atuinissamut kommunalbestyrelsimut oqartussaassusilerneqarneq aalangiisuussasoq. Kommunalbestyrelsip oqartussaassutsimik akisussaassutsimillu tigumminninnerata attanneqarnissaanik kissaateqarnerumut aaqqissuussineq ersiutaavoq, taamatullu kommunip immikkoortortaqarfiinik assigiinngitsunik

ataatsimut ingerlatsiveqarnerup attanneqarnerata allaffissornikkut iluaqutissartaata attanneqarnissaanik.

Aammattaaq Inatsisinut Ataatsimiititaliap maluginiarpaa nunaqarfiit aqutsisuisa piginnaatitaaffii il.il. pillugit malittarisassat atuuttut allanngortinneqarsinnaaneranut apeqqutip kinguartinneqarnissaa KANUKOKA-mit kissaatigineqartoq, taamaalilluni KANUKOKA-p ataatsimeersuarnerani tullermi allannguutissat siunnersuutigineqartut pillugit isummersornissamut KANUKOKA periarfissinneqarluni.

Naalakkersuisut tassunga tunngatillugu oqaatigaat inatsisissatut siunnersuut ilaatigut KANUKOKA-mut kommuninullu tusarniaassutigineqareersoq, Naalakkersuisullu tamanna tunngavigalugu allannguutissat siunnersuutigineqartut kinguartinneqarnissaanut tunngavissaqarsorinngikkaat.

#### **2.4. Nakkutilliisoqarfiup katitigaanera - KANUKOKA’p toqqaasinnaatitaanera**

Nakkutilliisoqarfimmut ilaasortat marluk, maannakkutut KANUKOKA-mit toqqarneqaratik, kommuninit ataatsimut toqqarneqartussaanerat siunnersuutip nassataraa. Tamatumunnga tunngavigitinneqarpoq peqatigiiffimmut kommunit tamarmiunngitsut ilaasortaammata.

KANUKOKA-p Inatsisinut Ataatsimiititaliamut tikkuarpaa Nakkutilliisoqarfimmut ilaasortassanik marlunnik toqqaanissamut periusissatut siunnersuutigineqartoq malillugu kommunit nammineerlutik ataatsimut toqqaasalissasut (maannakkutut KANUKOKA-mit pinnani), suliani Nakkutilliisoqarfiup kommunit arlaat pillugu naammagittaalliummik suliaqarneranut atatillugu, suliamut attuumassuteqarneq pissutigalugu ajornartorsiutinik / soqutigisat aporaannerannik nassataqarsinnaasoq.

Naalakkersuisut tamatumunnga oqaaseqaataat Inatsisinut Ataatsimiititaliap pissarsiarivaa. Naalakkersuisut akissumminni imatut paasisutissiipput:

Inatsisissatut siunnersuummi § 52, imm. 3 imatut oqaasertalerneqarsimavoq:  
 ”Ilaasortaq Nakkutilliisoqarfiup isumaqatigiinniarnani taasineranilu peqataasinnaanngilaq, suliaq kommunimut ilaasortap ilaasortaaffigisaanut tunngasuuppat.”

Aalajangersagaq kommunit aqunneqarnerat pillugu Inatsisartut inatsisaanni nr. 22-mi, 18. November 2010-meersumi maanna atuuttumi § 62, imm. 3-mik ingerlatseqqinneruvoq. Nakkutilliisoqarfimmut ilaasortat marluk inatsisissatut



siunnersuut naapertorlugu kommunit ataatsimoorlutik, tassalu KANUKOKA-anngitsumit toqqarneqartussaammata, tamanna ilaasortap piginnaaneqarnissaanut piumasaaqammik allanngortitsinngilaq.

Kikkut toqqarneqarnissaat pillugu kommunit akunnerminni isumaqatigiissuteqarsinnaanngikkaangata, kommunit ilaasortassanik marlunnik toqqaanissaanut najoqqutassanik KANUKOKA aamma ujartuivoq.

Naalakkersuisut tamatumunnga oqaaseqaataat Inatsisinut Ataatsimiititaliap pissarsiarivaa. Naalakkersuisut akissumminni imatut paasissutissiipput:

Inatsisissatut siunnersuummi § 50, imm. 1, stk. 3 naapertorlugu kommunit ataatsimoorlutik Nakkutilliisoqarfimmut ilaasortassanik marlunnik toqqaassapput.

Kommunit ilaasortassanik toqqaaniarneranni kikkut toqqarneqarnissaannik kommunit akornanni isumaqatigiittoqarsinnaatinnagu qanoq iliortoqarnissaanut maleruagassiornissamut Naalakkersuisut piiareersimapput.

Najoqqutassiat taamaattut iluaqutaasinnaasutut Inatsisinut Ataatsimiititaliamit nalilerneqarput. Ataatsimiititaliap Naalakkersuisut **kaammattorpai** najoqqutassanik taamaattunik aalajangersaasinnaanermut inatsisissatut siunnersuutikkut tunngavissiinissap pisariaqarsinnaanera isumaliutigequllugu – imaluunniit najoqqutassiat inatsisissatut siunnersuummut namminermet ilanngunneqartartariaqarsinnaanerat.

## **2.5. Kommunini sulisunut aningaasarsiaqartitaanikkut-, atorfeqarnermi-kiisalu soraarnerussutisiaqalernermi atugassarititaasut – KANUKOKA’p isumaqatigiinniarsinnaatitaanera**

Inatsisissatut siunnersuutip nassataraa kommunini sulisut nalinginnaasumik akissarsiaqartitaanerinit, atorfeqartitaanerinit, soraarnerussutisiaqartitaanerinullu atugassarititaasut pillugit aalajangersakkat Naalakkersuisut kommunillu isumaqatigiissuteqareernerisigut aalajangersarneqarnissaat (maannakkutut Naalakkersuisut KANUKOKA-llu isumaqatigiissuteqareernerisigut pinnani).

Aamma tassani tunngaviuvoq kommunit tamarmiunngitsut peqatigiiffimmut ilaasortaalersimammata.

Inatsisinut Ataatsimiititaliap maluginiarpaa kattuffiit arlallit (IMAK, AK kiisalu SIK) tusarniaanermut akissumminni kommunini aningaasarsiaqartitaanermi atorfeqarnermilu assigiimmik atugaqartitsinissap pingaaruteqarnera erseqqissaatigisimagaat. Tamanna

tunngavigalugu inatsisissatut siunnersuummi § 59, kommuninik ataasiakkaaraluni isumaqatigiinniaqateqarnissamik nassataqarnersoq erseqqissarneqarnissaa IMAK-ip aalajangiisuutippaa, imaluunniit kommunit tamarmik (tassa kommunit KANUKOKA-mut ilaasortaasut kisimiunngitsoq) akissarsiat pillugit isumaqatigiinniarnernut peqataatinneqarnissaat aalajangersakkap nassatariinnarneraa.

Inatsisinut Ataatsimiititaliap paasivaa Naalakkersuisut tusarniaanermi akissutitut oqaaseqaatiminni Naalakkersuisut, KANUKOKA-p, Qaasuitsup Kommuniata, Qeqqata Kommuniata, Kommuneqarfik Sermersuup aamma Kommune Kujallip isumaqatigiissutaannut 17. november 2016-imeersumut innersuussisut.

Isumaqatigiissut isumaliutissiissummut uunga ilanngussaq 3-tut akkiunneqarpoq.

Isumaqatigiissummi erserpoq pisortat ingerlatsiviini sulisut tassani aamma kommunini sulisut akissarsiatigut sulinermilu atugaat pillugit ataatsimoorussamik Naalakkersuisut isumaqatigiissuteqassasut. Naalakkersuisut ataatsimoorussamik isumaqatigiinniuteqarneri pisinnaatitsissutip isumaqatigiinniarnernut isumaqatigiissuteqarnermullu ataatsimiititaliamit aalajangersarneqarsimasup tunngavissiissutaa naapertorlugu pissaaq. Isumaqatigiinniarnernut isumaqatigiissuteqarnermullu ataatsimiititaliaq erfineq pingasunik ilaasorta qarpoq, taakkunannga sisamat Naalakkersuisunit toqqarneqarsimassapput sisamallu kommuninit toqqarneqarsimassallutik. Kommunit ilaat ataaseq imaluunniit arlallit assersuutigalugu KANUKOKA-meersumik imaluunniit ataatsimoorullugu aallartitamik sinniisoqarnissartik toqqarsinnaavaat. Isumaqatigiinniarnernut isumaqatigiissuteqarnermullu ataatsimiititaliami inissat kommunit aggulunneqarneranni amerlineqassanngillat.

Naalakkersuisut Inatsisinut Ataatsimiititaliamut akissumminni erseqqissaatigaat Naalakkersuisut kommuninik ataasiakkaaralutik aningaasarsiat- atorfeqarnermilu pissutsit pillugit isumaqatigiinniaqateqarnianngitsut, tamannalu tunngavigalugu kommunit akornanni aningaasarsiatigut assigiinngitsumik ineriartortoqarnissaanik annilaanngateqarnissamut tunngavissaqanngitsoq.

Aammattaaq Inatsisinut Ataatsimiititaliap paasivaa KANUKOKA- p apeqquersimagaa Kommuneqarfik Sermersuup KANUKOKA-mut ilaasortaajunnaanera inatsimmik pineqartumik allannguinerup pisariaqalerneranik nassataqarsimasinnaanersoq. KANUKOKA-p tassunga atatillugu tikkuarppaa Naalagaaffeqatigiinni oqartussaasut sinnerlugit piginnaatitsinerup kattuffinnut ilaasortaaffigineqartariaqanngitsunut tunniunneqartarneranik arlalinnik assersuutissaqartoq. Tassani sammisami suliffeqarfiit nammineerlutik sunniuteqarumallutik ilaasortanngussanerlutik imaluunniit avataaniiginnassanerlutik aalajangigassaraat. Taamatuttaaq inuussutissarsiortut namminersortut eqqarsaatigalugit



tassani Sulisitsisut (GE) kattuffiillu akornanni pingaarnertut isumaqatigiissutit atuupput, tassa Sulisitsisunut (GE-mut) ilaasortaanissaq pisussaaffiusariaqarani.

Naalakkersuisut tamanna pillugu oqaaseqaatigaat, kommunit tamanna kissaatigigunikku isumaqatigiinniarnermut isumaqatigiissuteqarnermullu ataatsimiititaliami KANUKOKA-mit aallartitaqarlutik isumaqatigiinniunneqarsinnaasut. Naalakkersuisut tamanna tunngavigalugu oqartussaarnermut piginnaatitaaffiup KANUKOKA-mut tunniunneqarnissaa tunngavissaqarsorinngilaat.

Inatsisinut Ataatsimiititaliap paasivaa kommunit avinneqareerpata isumaqatigiinniarnermut isumaqatigiissuteqarnermullu ataatsimiititaliami inissanut katillugit sisamaasunut toqqaasussat kommunit tallimaajumaartut. Taamaalilluni aamma tassani pisuni kikkut toqqarneqarnissaannik kommunit akornanni isumaqatigiinngittoqarnerani, kommunit ilaasortassanik toqqaanerisa qanoq pinissaanut najoqqutassaqaqtariaqarpoq. Ataatsimiititaliap Naalakkersuisut **kaammattorpai** najoqqutassiaq taamaattoq pillugu kommuninut isumaqatigiissuteqarnissap pisariaqarnera isumaliutigequllugu.

Kommunit tamanna kissaatigigunikku isumaqatigiinniarnermut isumaqatigiissuteqarnermullu ataatsimiititaliami KANUKOKA-mit aallartitaqarsinnaanerannik Naalakkersuisut paasissutissiinerat ataatsimiititaliap maluginiarpa. Ataatsimiititaliattaq maluginiarpa aningaasarsiaqartitaaneq- atorfeqarnermilu atugassarititaasut pillugit kommuninik ataasiakkaaraluni isumaqatigiinniaqateqannginnissamik Naalakkersuisut paasissutissiisut, taamaalillunilu kommunit akornanni aningaasarsiatigut assigiinngiiaamik ineriartortoqalernissaanik annilaanngateqarnissamat tunngavissaqanngitsoq. Piumasaqaatit taakku marluk ataatsimiititaliamit assut pingaartinneqarput, aalajangiusimaneqarnissaallu ataatsimiititaliamit Naalakkersuisunut **kaammattuutigineqarpoq**.

### 3. Pisortanut aningaasaqarnikkut kingunissat

Nuna tamakkerlugu kommunalbestyrelsinut ilaasortat amerlanerpaaffissaat inatsisissatut siunnersuutikkut qulingiluanik amerlissinneqarput.

Inatsisissatut siunnersuut peqatigitillugu illoqarfanni aqqaneq marlunni pinngitsoorani najukkami ataatsimiititalianik pilersitsinissamik pisussaaffiliivoq. Ullumikkut taamaallaat illoqarfanni pingasuni najukkami ataatsimiititalianik pilersitsisoqarsimavoq. Ilaasortaaq aningaasarsiaqartitaapput. Najukkami ataatsimiititaliami ilaasortat amerlanerpaaffissaat pillugu inatsisissatut siunnersuutikkut aalajangersaasoqanngilaq.

Taamaalilluni kommunini qinikkat il.il. aningaasarsiaqartitaanerannut aningaasartuutit amerlinerannik siunnersuut nassataqassaaq.

UKA2013/104-mut ataatsimiititaliap isumaliutissiissutaa tunngavigalugu Inatsisinut Ataatsimiititaliap paasivaa kommuninik iluarsaaqqinnermi kommunalbestyrelsinut nunaqarfinnilu aqutsisunut ilaasortat aningaasarsiaqartitaanerannut aningaasartuutaasunik sipaaruteqarneq annikitsuinnaasimasoq. 2008-mi kommuninik kattussuutsitsineq sioqqullugu tamatumunnga aningaasartuutit katillutik 47 mio. kr-it pallissimavaat, 2011-milu 34 mio. kr-it pallissimallugit. Naak kommunalbestyrelsit 78 %-it missaannik ikilisinneqaraluartut nunaqarfimmilu aqutsisut affaasa missaannik amerlassuseqaleraluartut, taamaallaat najukkami qinikkat aningaasarsiaqartitaanerannut katillugu 28 %-it missaannik taamaalilluni sipaaruteqartoqarsimavoq.

Inatsisinut Ataatsimiititaliap UKA2012/28-mik (Kommunalbestyrelsinut, nunaqarfinni aqutsisunut ilagiillu sinniisaannut qinersisarnerit pillugit Inatsisartut inatsisaattut siunnersuut) suliarinninnerminut atatillugu taamanikkut Naalackersuisuusunut apeqqutigaa kommunit najukkami ataatsimiititalianik aningaasarsiaqartitaasunik ilaasortaqaqtunik pilersitsinissaminnut periarfissinneqassappata, kommunini qinikkanut katillugu aningaasartuutaasut amerlinissaat pinaveersaarniarlugu periarfissat suut Naalackersuisut takorloorneraat.

Naalackersuisut akissutiminni tikkuarpaat najukkami ataatsimiititaliat aningaasarsiaqartitaanerat, kommunalbestyrelsini ilaasortanut kommuninilu ataatsimiititalianut allanut aningaasarsiaritinneqartut nalimmassarnerisigut aningaasalersorneqarsinnaasoq<sup>1</sup>.

Inatsisinut Ataatsimiititaliap isumaliutissiissummini paasivaa tamatuma saniatigut aningaasalersuinissamut allamik aamma periarfissaqarsimasoq Naalackersuisut akissumminni saqqummiussimangisaannik; tassalu kommunalbestyrelsinut ilaasortat ikilisinneqarnerisigut.

Inatsisinut Ataatsimiititaliap ullumikkut tikkuartariaqarpaa Naalackersuisut najukkani ataatsimiititalianik pilersitsinermut atatillugu, kommunini qinikkat aningaasarsiaqartitaanerannut katillugit aningaasartuutaasut amerlinnginnissaat isumannaarniarlugu iliuuseqarsimangitsut (imaluunniit killilerujussuarmik iliuuseqarsimasut).

---

<sup>1</sup> Naalackersuisut akissuteqaamminni aamma tikkuarpaat najukkami ataatsimiititalianut aningaasarsiarititat amerlanerpaaffissaannik aalajangersaasoqarsinnaasoq. Amerlanerpaaffissaliinerli taamaattoq namminerminik najukkami ataatsimiititalianik pilersitsinermut atatillugu kommunini qinikkanut il.il. aningaasartuutaasut amerlinissaannik pinngitsoortitsinnaangilaq.



Kommunalbestyrelsinut ilaasortat aningaasarsiaasa amerlanerpaaffissalerneqarnerat allannguuteqanngilaq. Kommunalbestyrelsinut ilaasortat amerlanerpaaffissalerneqarnerat marlunnik ikilisisinikkut iliuuseqarfigineqarpoq, tamannali taamaallaat Kommuneqarfik Sermersuumi.

Inatsisinut Ataatsimiititaliap maluginiarppaa inatsimmut nassuiaatini piunasaqaataasoq siunnersuutip nassataanik najukkami ataatsimiititaliat ilaasortaasa aningaasarsiaqartitaanerannut kommuninut aningaasartuutaanerusut missingersuutitigut atugassarititaareersuni nassaarineqassasut. Allatut oqaatigalugu taamaalillutik kommunit aningaasartuutaanerusunut taakkununga matussusiivigineqassanngillat.

Najukkamili ataatsimiititalianut ilaasortat aningaasarsiaqartitaanerannut aningaasartuutaanerusussat missingersuutinit pioreersunit nassaarineqartussaanerisigut qinikkat il.il. aningaasarsiaqartitaanerannut aningaasartuutaasut amerlinissaasa pinaveersaartinneqarnissaat qularnaarneqanngilaq. Taamaalilluni inatsisissatut siunnersuut taamak iluseqartillugu kommunit ataasiakkaat immikkoortuni sorlarni matussusiisumik sipaaruteqarnissartik nammineerlutik aalajangissavaat, tassani aamma aningaasarsianut aningaasartuutaanerusut innuttaasunik kiffartuussinermi sipaaruteqarnikkut nassaarineqassanersut.

#### **4. Oqaaseqaatit allat**

##### **4.1. Nunaqarfiit ataatsimut aqutsisuini nunap immikkoortuanit sinniisuutit**

Inatsisinut Ataatsimiititaliap maluginiarppaa inatsisissatut siunnersuutip siullermeerneqarnerani nunaqarfinni ataatsimut aqutsisuni nunap immikkoortuanit aallartitat inissamik isumannaaruneqarnissaannut aqqissuussinermik ujartuisoqartoq.

Ataatsimiititaliaq isumaqarpoq tamanna ajornartorsiutaasoq isumaliutigisariaqartoq. Kommunilluna aqunneqarnerat pillugu Inatsisartut inatsisaanni nunaqarfiit ataatsimut aqutsisuinut qinersisarnermut malittarisassaqaarani kommunalbestyrelsinut, nunaqarfinni aqutsisunut ilagiillu sinniisaannut qinersisarnerit pillugit Inatsisartut inatsisaanni taamaattoqartoq. Taamaammat aqqissuussinermik nunaqarfiit ataatsimut aqutsisuinut nunap immikkoortuanit aallartitaqarnissamik isumannaarisumik pilersitsiniaraanni, kommunalbestyrelsinut, nunaqarfinni aqutsisunut ilagiillu sinniisaannut qinersisarnerit pillugit Inatsisartut inatsisaat taannaavoq allanngortitassaq.

##### **4.2. Inatsisissatut siunnersuutip kalaallisuuata qallunaatuatalu naapertuutinnginnerat**

Inatsisinut Ataatsimiititaliap paasivaa inatsisissatut siunnersuutip kalaallisuuani § 32 imm. 4-mi, kiisalu §44, imm. 2, nr. 5-imi “susassareqatigiilluni sammisaqartitsineq” assigiinngitsunik taaguuserneqarsimasoq. Taaguutilli atorineqarsimasut arlaannaalluunniit “susassareqatigiilluni sammisaqartitsinerup” nalinginnaasumik paasineqartarneranut naapertuutinnilaq.

Immikkoortunitaaq allani arlalinni inatsisissatut siunnersuutip kalaallisoortaa iluarsiiiffiqarsinnaasorinarpoq.

## **5. Inatsisinut Ataatsimiititaliap inassuteqaataa**

Isumaliutissiisummi uani immikkoortoq 1.1-imi allassimasutut Naalakkersuisup siunnersuutip allanngortittariaqarsinnaanera Inatsisinut Ataatsimiititaliamut isumaliutigequsimavaa, taamaalillutik najukkami ataatsimiititaliat illoqarfinni kommunit ingerlatsiviisa qullersaqarfigisaanni aamma pilersinneqarsinnaalersillugit.

Ataatsimiititaliaq isumaqarpoq illoqarfiit tamarmik assigiimmik atugassaqartinneqartariaqartut, taamaammallu najukkami ataatsimiititalianik pilersitsisussaataaneq aamma illoqarfinni kommunit ingerlatsiviisa qullersaqarfigisaanni atuuttariaqartoq. Ataatsimiititaliap Naalakkersuisut **kaammattorpai** tamanna siunertaralugu allannguutissatut siunnersuummik saqqummiusseqqullugit.

Ataatsimiititaliap isumaqatigiittup pingajussaaneerinninnermut allannguutissatut siunnersuummik saqqummiusisoqarnissaa naatsorsuutigalugu inatsisissatut siunnersuutip akuersissutigineqarnissaa inassutigaa.

Inatsisinut Ataatsimiititaliap taama oqaaseqaateqarluni siunnersuut aappasaaniigassanngortippaa.






Debora Kleist  
Siulittaasuugallartooq  
*Inuit Ataqatigiit*



Iddimanngiu Bianco  
*Inuit Ataqatigiit*



Laura Táunâjik  
*Siumut*



Pitsi Høegh  
*Siumut*



Per Rosing-Petersen  
*Partii Naleraq*

Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu  
Naalakkersuisoq  
Maani

28. oktober 2017

**UKA2017/106: Uunga siunnersuut: Kommunit aqunneqarnerat pillugu Inatsisartut inatsisaat nr. xx, xx. xxx 2017-imeersoq.**

Inatsisartut katersuunnermi pisumi kommunit aqunneqarnerat pillugu Inatsisartut inatsisissaattut siunnersuut suliarat (UKA2017/106). Siunnersuut Inatsisinut Ataatsimiititaliamut suliassanngorlugu innersuunneqarpoq.

KANUKOKA Inatsisinut Ataatsimiititaliamut sassartitaqarpoq, tassungalu atatillugu allakkiaq ilanngussatut nassiunneqartoq ataatsimiititaliamut tunniunneqarluni, Naalakkersuisoq taanna pillugu oqaaseqaateqaqqullugu ataatsimiititaliamit qinnuigineqarpoq.

Ingammillu ataani pineqartunut Naalakkersuisut isummernissaat ataatsimiititaliap qinnutigaa:

*Kommunit Nakkutilliinermut Siunnersuisoqatigiinni ilaasortaataqarnerat:*

1. KANUKOKA-mit tikkuarneqarpoq Nakkutilliinermut Siunnersuisoqatigiinnut ilaasortassanik marlunnik toqqaanissamut periusissatut siunnersuutigineqartoq malillugu kommunit nammineerlutik ataatsimut toqqaasalissapput (maannakkutut KANUKOKA-nngitsoq), suliani Nakkutilliinermut Siunnersuisoqatigiit kommunit arlaat pillugu naammagittaalliummik suliaqarnerannut atatillugu, suliamut attuumassuteqarneq pissutigalugu ajornartorsiutinik / soqutigisat aporaannerannik nassataqarsinnaasoq. Naalakkersuisut tamatumunnga qanoq oqaaseqaatissaqarpat?
2. Kikkut toqqaarneqarnissaat pillugu kommunit akunnerminni isumaqatigiissuteqarsinnaanngikkaangata, kommunit ilaasortassanik marlunnik toqqaanissaannut malittarisassanik KANUKOKA ujartuivoq. Naalakkersuisut tamatumunnga qanoq oqaaseqaatissaqarpat?

*Kommunini sulisut aningaasarsiaasa-, atorfeqarnermi atugarisaasa- kiisalu soraarnerussutisiaqalernermi atugassarititaasut ataatsimut isumaqatigiinniutigineqarneranni kommunit peqataataqarnerat:*



3. Inatsisissatut siunnersuut malillugu aningaasarsiaqartitaanikkut-, atorfeqarnermi-, soraarnerussutisiaqalernermi atugassiissutaasut pillugit aalajangersakkat Naalakkersuisut kommunillu akunnerminni isumaqatigiissutigisassavaat (maannakkutut KANUKOKA-p Naalakkersuisullu akunnerminni isumaqatigiissuteqarnerisuunngitsoq). Kommuneqarfik Sermersuup KANUKOKA-mut ilaasortaajunnaarnera inatsimmik pineqartumik allannguinerup pisariaqalerneranik nassataqarsimasinnaanersoq KANUKOKA-p apeqqutigaa. KANUKOKA-p tassunga atatillugu tikkuarppaa Naalagaaffeqatigiinni oqartussaasut sinnerlugit piginnaatitsinerup kattuffinnut ilaasortaaffigineqartariaqanngitsunut tunniunneqartarneranik arlalinnik assersuutissaqartoq. Tassani sammisami suliffeqarfiit nammineerlutik sunniuteqarumallutik ilaasortanngussanerlutik imaluunniit avataaniiginnassanerlutik aalajangigassaraat. Taamatuttaaq namminersortut eqqarsaatigalugit tassani Sulisitsisut (GE) kattuffiillu akornanni pingaarnertut isumaqatigiissutit atuupput, tassa Sulisitsisunut (GE-mut) ilaasortaanissaq pisussaaffiusariaqarani. Sulisut aningaasarsiaasa-, atorfeqarnermi atugaasa-, soraarnerussutisiaqarnermi atugassaasa isumaqatigiinniutigineqarneranni kommunit KANUKOKA-llu aallartitaannut tunngatillugu aallaaviup taamaattup atorreqarsinnaanera isumaliutigineqarsinnaanerluni?
4. KANUKOKA- p tikkuarppaa inatsisissatut siunnersuut pisortat suliffeqarfiutaanni equngasoqalersitsisoq, tassami tjenestemandinut tunngatillugu suli KANUKOKA isumaqatigiinniarsinnaatitaammat. Naalakkersuisut tamatumunnga qanoq oqaaseqaatissaqarpat?
5. KANUKOKA-p annilaanngatigaa inatsisissatut siunnersuutigineqartup nassatarisinnaagaa kommunit ataasiakkaarlugit aningaasarsiat atorfeqarnermilu atugassarititaasut pillugit isumaqatigiinniartigineqartalernerat, tamatuma nassatarisinnaallugu kommunit akornanni aningaasarsiatigut atugassarititaasut assigiinngitsumik ineriartulernerat. Naalakkersuisut tamatumunnga qanoq oqaaseqaatissaqarpat?

*KANUKOKA-p atuuffianik allannguipeq*

6. Oqaatigineqartutut KANUKOKA inatsimmut allannguutissaatut siunnersuutigineqartukkat kommunit sinniisaattut suliarisartagaasa ilaannik arsaarneqartoq. KANUKOKA piunnarnissaminut tunngavissaqarnerasoq KANUKOKA-mi oqallisigineqalernissaa KANUKOKA-p annilaanngatigaa. Atorunnaarsitsineq pisinnaasoq kalaallit danskillu inatsisaannik annertuunik allanngortiterinissap pisariaqalerneranik nassataqassaaq, tassami inatsisini allanilu assigiinngitsuni 20-t 30-llu akornanni amerlassusilinni aalajangersarneqarsimammat KANUKOKA tusarniarneqartussaasoq, ilaasortassanik toqqaasussaasoq imaluunniit isumaqatigiinniartussaasoq.

7.

*Nunaqarfiit aqutsisui*

8. Inatsisissatut siunnersuutip nassataraa kommunalbestyrelsit nunaqarfimmi aqutsisunut atugassiissutissanik immikkoortitsisalernissamut pisussaaffilerneqarnerat. Taamaattorli suliassaqarfiit suut nunaqarfimmi aqutsisunut ingerlatassanngortinneqarnissaat kommuninut namminernut aalajangigassanngortinneqarpoq. KANUKOKA tassunga atatillugu ajornartorsiut una tikkuarppaa: Nunaqarfimmi aqutsisunik piginnaatitsinerup

aningaasaliinerullu ataqatigiinnissaat inatsisissatut siunnersuutikkut qularnaarneqanngilaq. Naalakkersuisut tamatumunnga qanoq oqaaseqaatissaqarpat?

*Najukkami Ataatsimiititaliat*

9. Najukkami Ataatsimiititalianik pinngitsoorani pilersitsisussanngortitsineq KANUKOKA-p pisariaqarsorinngilaa, tassungalu atatillugu kommunalbestyrelsini nunap immikkoortuanit ilaasortaatat pillugit malittarisassat atuuttut tikkuarlugit. Naalakkersuisut tamatumunnga qanoq oqaaseqaatissaqarpat?

*Inatsisissatut siunnersuummi immikkoortut ilaasa kinguartinneqarsinnaanerannut periarfissaq*

10. KANUKOKA-p Inatsisinut Ataatsimiititaliamut sassartitaqarnermini nunaqarfiit aqutsisuiut kiisalu najukkami ataatsimiititalianut tunngatillugu allannguutissatut siunnersuutigineqartut aappaagumut kinguartinneqarnissaat kaammattuutigaa, tamanna KANUKOKA-p ataatsimeersuarnerani allannguutissat siunnersuutigineqartut pillugit oqallisiginninnissamut KANUKOKA periarfissikkumallugu. Naalakkersuisut tamatumunnga qanoq oqaaseqaatissaqarpat?

Inussiarnersumik

Debra Kleist  
Inatsisinut Ataatsimiititaliap Siulittaasorigallagaa





Inatsisartut  
Inatsiseqarnermut Ataatsimiititaliaq  
c/o Inatsisartut Allattoqarfiat

Ilanngussaq 2  
Bilag

**Pineqartog. UKA2017/106: Kommunit aqunneqarnerat pillugu**  
**Inatsisartut inatsisaannut nr. xx, xx. xxx 2017-imeersumut siunnersuut.**

03-11-2017  
Sagsnr.: 2017-17261  
Dok. nr. 23608332

Postboks 909  
3900 Nuuk  
Tlf.: (+299) 34 50 00  
E-mail: box909@nanoq.gl  
www.naalakkersuisut.gl

Inatsiseqarnermut Ataatsimiititaliap allakkatigut 28. oktober 2017-imeersutigut Naalakkersuisut qinnuigai inatsisissatut siunnersuummut matuma siuliani taaneqartumut tunngatillugu apeqqutinut arlalinnut akissuteqaqqullugit.

Matumuuna akissuteqaat piareerneqarpoq.

**1 pillugu.** Inatsisissatut siunnersuummi § 52, stk. 3 imatut oqaasertaqarpoq:

”Ilaasortaq suliani, ilaasortap kommunimut kommunalbestyrelsimut ilaasortaaffigisaanut tunngasuni Nakkutilliisoqarfiup isumaqatiginninniarnerninut taasinerinullu peqataasinnaatitaangilaq.”

Aalajangersagaq kommunit aqunneqarnerat pillugu Inatsisartut inatsisaanni nr. 22-mi, 18. november 2010-meersumi maanna atuuttumi § 62, imm. 3-mik ingerlatitseqqinneruvoq. Nakkutilliisoqarfimmu ilaasortat marluk inatsisissatut siunnersuut naapertorlugu kommunit ataatsimoorlutik, tassalu KANUKOKA-anngitsumit toqqarneqartussaammata, tamanna ilaasortap piginnaaneqarnissaanut pimasaaqammik allanngortitsinngilaq.

**2 pillugu.** Inatsisissatut siunnersuummi § 50, imm. 1, nr. 3 naapertorlugu kommunit ataatsimoorlutik Nakkutilliisoqarfimmu ilaasortassanik marlunnik toqqaasussaapput.

Kommunit ilaasortassanik toqqaaniarnernanni kikkut toqqarneqarnissaannik kommunit akornanni isumaqatigiittoqarsinnaatinnagu qanoq iliortoqarnissaanut maleruagassiornissamut Naalakkersuisut piareersimapput.

**3 pillugu.** Ullumikkut Isumaqatiginninniartarnernut Isumaqatigiissuteqartarnernullu Ataatsimiititaliap pilersinneqarsimasup oqaluttuassartaa 1980-imit aallartippoq, tassa Pisortat Isumaqatigiissuteqartarnernut Ataatsimiititaliaat (DOA) pillugu inatsit pilersinneqarmat. 1991-imi DOA inatsisiliornikkut atorunnaarsinneqarpoq. Isumaqatiginninniarsinnaatitaaneq Kalaallit Nunaanni Pisortanut

tunniunneqarpoq. Taanna tunngavigalugu KANUKOKA-p aamma Kalaallit Nunaanni Namminersornerullutik Oqartussat akornanni suleqatigiinnissamat isumaqatigiissusiortoqarpoq. Isumaqatigiissut kingusinnerusukkut Isumaqatiginninniartarnernut Isumaqatigiissuteqartarnernullu Ataatsimiititaliamut atuutsinneqalerpoq, kingullermik 17. november 2016-imi isumaqatigiissuteqartoqarluni.

Taamaattumik pisortat ingerlatsiviini aammalu Namminersorlutik Oqartussat kommunillu ataanni suliffeqarfinni atorfilinnut akissarsianut atorfeqarnermilu atugassarititaasut pillugit ataatsimut isumaqatigiissutit Naalakkersuisunit atulersinneqartarput atorunnaarsinneqartarlutillu. Isumaqatiginninniartarnernut Isumaqatigiissuteqartarnernullu Ataatsimiititaliami ilaasortat arfineq pingasuupput, taakkunanga sisamat Naalakkersuisunit toqqarneqartarlutik sisamallu kommuninit toqqarneqartarlutik. Kommuninit ataaseq amerlanerusulluunniit ataatsimoorlutik ataatsimiititaliamut ilaasortassamik toqqaanermikkut imaluunniit aaqqissuusaaneq, soorlu KANUKOKA aqutigalugu ilaasortaataqarnissartik aalajangersinnaavaat. Naalakkersuisut kommunillu akornanni isumaqatiginninniarnissamat piginnaatitsissut isumaqatigiissutigineqarsinnaangippat, tamanna siulliullugu taaneqartumit aalajangerneqassaaq. Ataatsimiititaliaq ilaatigut Naalakkersuisut sulisartut kattuffiitut isumaqatiginninniarnissaannut piginnaatinneqartussanik Naalakkersuisunut inassuteqartassaaq, tak. Naalakkersuisut, KANUKOKA-p kommunillu akornanni isumaqatigiissummi 17. november 2016-imeersumi § 2 aamma § 4.

Tamanna tunngavigalugu Naalakkersuisut isumaqarput, oqartussaasutut piginnaasaqarnerup KANUKOKA-mut tunniunneqarnissaa tunngavissaqanngitsaq.

**4 pillugu.** Kalaallit Nunaanni Namminersornerullutik Oqartussani kommuninilu tjenestemandit pillugit Inatsisartut inatsisaanni nr. 21-mi, 18. december 2003-meersumi § 47, imm. 1-imi allassimavoq, "Akissarsiat atorfeqarnermilu atugassarititaasut allat Naalakkersuisut aamma qitiusumik kattuffiit § 51-imi taaneqartut akornanni isumaqatigiissuteqarnikkut aalajangersarneqartassapput". Aalajangersakkamut tassunga oqaaseqaatini imatut allassimasoqarpoq: "Akissarsiat atorfeqarnermilu atugassarititaasut illuatungeriit isumaqatiginninniarsinnaatitaasut, tassalu Naalakkersuisut aammalu qitiusumik kattuffiit § 51-imi taaneqartut akornanni aalajangersarneqartassapput. Tassalu Kalaallit Nunaanni Namminersornerullutik Oqartussani aammalu kommunini tjenestemandit atorfeqartunut tunngatillugu Naalakkersuisut sulisitsisut tungaanniit isumaqatiginninniarsinnaatitaapput."

§ 51-imi erseqqissarneqarpoq, qitiusumik kattuffiit Kalaallit Nunaanni angerlarsimaffeqassasut. Ullumikkut qitiusumik kattuffiit sisamaapput: IMAK, PPK, AK aamma ASG.



Tassalu matuma siuliani allassimasut tunngavigalugit pisortani suliffeqarnermi equngasumik inissisimasoqanngilaq.

**5 pillugu.** Naalakkersuisuni kommuninilu sulisunut akissarsianut atorfeqarnermullu atugassarititaasut ataqatigiissinneqarnissaat ataatsimullu aaqqissuunneqarnissaat anguniarlugu Naalakkersuisut kommunillu suleqatigiinniarlutik isumaqatigiipput. Tamanna aamma atorfinitsitsisarnermi atugassarititaasunut tamanut atuuppoq, akissarsiallu assigiinnginnerat taamaallaat atorfinni aalajangersimasuni akisussaaffiit suliassallu assigiinnginnerinut takussutissaassaaq, tak. Naalakkersuisut, KANUKOKA-p kommunillu akornanni isumaqatigiissummi 17. november 2016-imeersumi § 1.

Tassalu Naalakkersuisut akissarsianut atorfeqarnermullu atugassarititaasut pillugit kommuninut ataasiakkaanut isumaqatiginninniartassanngillat, tamatumalu kingunerisaanik kommunini akissarsiat assigiinngitsumik ineriartornissaannut ernumanissamut tunngavissaqassanngilaq.

**6 pillugu.** Naalakkersuisut kommunit tamarmik ilaasortaajunnaarnerisa kingorna KANUKOKA-p inissisimanerata allanngornera, kiisalu atorunnaarsitsisinnaanerup inatsisit arlallit allanngortinneqarnissaasa pisariaqartinneqarneranik kinguneqarsinnaanera eqqumaffigaat.

**7 pillugu.** Inatsisissatut siunnersuut naapertorlugu kommunalbestyrelsit aningaasanik, nunaqarfinni aqutsisut atorsinnaasaannik immikkoortitsisassapput. Nunaqarfinni Aqutsisut atuisinnaatitaanerat siomatigut atuussimasunik tunngaveqanngilaq, kommunalbestyrelsimit inatsisissatut siunnersuummi siunertanut taaneqartunut aningaasanik atuisinnaatitaanermut aalajangersimasumut oqartussaaffimmik suliakkiinermik tunngaveqarami, tak. inatsisissatut siunnersuummi § 44, imm. 2. Aaqqissuussinermi kommunalbestyrelsip pingaarnertut oqartussaasuunerata akisussaasuuneratalu, kiisalu kommunini immikkoortunik ingerlatsinerup atuutiinnarnerani allaffissornikkut iluaqutissat attatiinnarnissaannik kissaateqarneq tunngavigineqarpoq.

**8 pillugu.** 2009-mi kommunit kattunneqarnerisa kingorna qanitami oqartussaaqatigiinnerup nukittorsarneqarnissaa pisariaqartinneqarpoq. Taamaattumik inatsisissatut siunnersuummi ilaatigut illoqarfinni, kommunit ingerlatsiviisa qullersaqarfiginngisaanni najukkani ataatsimiititalianik pilersitsisoqassasoq peqqussutigineqarpoq. Najukkani ataatsimiititaliat sumiiffinniit kommunalbestyrelsimut ilaasortassanik qinersisarnermut aaqqissuussinermut pioreersumut tapiliunneqassapput.

**9 pillugu.** Naalakkersuisut inatsisissatut siunnersuut aqutugalugu kommunalbestyrelsip aningaasanik nunaqarfinni aqutsisunut atugassiisarnerata pinngitsoorani pisartussanngornissaa, aammalu illoqarfinni kommunip ingerlatsiviata qullersaqarfiginngisaanni najukkani ataatsimiititalianik pilersitsisoqarnissaa kissaatigaat.

Inatsisissatut siunnersuut ilaatigut KANUKOKA-mut kommuninullu tusarniaassutigineqarpoq.

Taanna tunngavigalugu allannguutissat siunnersuutigineqartut kinguartinneqarnissaat Naalakkersuisut tunngavissaqarsorinngilaat.

Inatsiseqarnermut Ataatsimiititaliaq paasissutissanik amerlanerusunik kissaateqarpat Naalakkersuisut ikiuunnissamut piareersimapput.

Inussiarnersumik inuulluaqqusillunga



Erik Jensen

Ilangussaq: Naalakkersuisut, KANUKOKA-p kommunillu akornanni isumaqatigiissut 17. november 2016-imeersoq.



Namminersorlutik Oqartussat

Ulloq 17. november 2016

Naalackersuisut, KANUKOKA aamma Qaasuitsup Kommuniata, Qeqqata Kommuniata, Kommuneqarfik Sermersuup aamma Kommune Kujalliup 17. november 2016 aallarnerfigalugu (tamatum kingorna kommuninik taaneqartut), Naalackersuisut kommuninilu sulisut akissarsiaqartitaanerisa atorfeqartitaanerisalu aalajangersaaffiginerinut atatillugu isumasioqatigiinneq ataqatigiissaarinissarlu pillugit isumaqatigiissut

§ 1

Naalackersuisut kommunillu sulisuisa akissarsiaqartitaanerannut atorfeqartitaanerannullu atatillugu isumasioqatigiinnissaq ataqatigiissaarinissarlu anguniassallugit suleqatigiissallutik Naalackersuisut kommunillu isumaqatigiipput. Atorfinitsitaanermi atugassarititaasut assigiit atuupput, akissarsiati-gullu assigiinngissutit tassaannaapput akisussaaffiit suliassallu suliassani aalajangersimasuni pineqartut.

§ 2

Kalaallit Nunaanni Namminersorlutik Oqartussat kommunillu, matumani ilanngullugit taakkunani tjenestemandit - ilanngussaq 1 naapertorlugu - pisortat suliffeqarfiutaanni aamma suliffeqarfinni sulisunut akissarsiat sulinermilu atugassarititaasut pillugit ataatsimoortumik isumaqatigiissutit il. il. Naalackersuisut isumaqatigiissutigissavaat atorunnaarsissallugillu. Naalackersuisut kommunillu sulisunut isumaqatigiissutit aalajangersarneqarsimasut tunngavigalugit atorfinitsitsisassapput. Isumaqatiginninniarnarit isumaqatiginninniarnissamut pisinnaatitsissutip aalajangersarneqarsimasup Naalackersuisunit akuerineqarsimasup iluani pisassapput.

Imm. 2. Naalackersuisut imm. 1 naapertorlugu sulinissamut tunngavissaq tunngavigalugu killilius-sat, Naalackersuisut kommunillu akornanni isumaqatigiissuteqarnikkut aalajangersarneqarsimasut iluanni isumaginnittassaaq.

Imm. 3. Naalackersuisut kommunillu akornanni isumaqatiginninniarnissamut pisinnaatitsissut isumaqatigiissutigineqarsinnaanngippat, tamanna siulliullugu taaneqartup aalajangersassavaa.

### § 3

Atorfinititaanermi isumaqatigiissutinik imaluunniit tjenestemandit isumaqatigiissutaannik matuneqarsinnaanngitsut malittarisassanik Naalackersuisut imaluunniit atorfinittumut immikkut isumaqatigiissummik Kalaallit Nunaanni Namminersorlutik Oqartussanit akuerineqarsimasumit pisasapput. Taamatut pisoqartillugu sulisitsisut Naalackersuisut kommunillu ataanniittut taamaallaat malittarisassani atugassarititaasut imaluunniit atorfinittumut toqqartumik isumaqatigiissummi atugassarititaasut akuerisat tunngavigalugit atorfinitsitsisoqarsinnaavoq, tak. § 7.

### § 4

§ 1-imi siunertat taaneqartut aamma § 2-mi, imm. 2-mi sulinissamut tunngavigineqartut atuutsinnisaat siunertaralugu, ataatsimiisitaliortoqassaaq, Isumaqatiginninniarnermut Isumaqatigiissuteqarnermullu Ataatsimiisitaliaq.

Imm. 2. Isumaqatiginninniarnermut Isumaqatigiissuteqarnermullu Ataatsimiisitaliaq arfineq-pingasunik ilaasortaqarpoq, taakkunannga sisamat Naalackersuisunit aamma sisamat kommuninit toqqarneqartassapput, aamma imm. 4 takuuk. Naalackersuisuni kommuninilu ilaasortat toqqakkat akornanni siulittaasut ukiut ataasiakkaarlugit paarlaattassapput. Naalackersuisut Isumaqatiginninniartarfiat allattoqarfittut atuutissaaq.

Imm. 3. Kommuni ataaseq imaluunniit kommunit arlallit ataatsimoortumik sinniisussamik imaluunniit kattuffik aqqutigalugu, soorlu assersuutigalugu, KANUKOKA, toqqaasinaavoq/toqqaasinaapput.

Imm. 4. Ilaasortat Naalackersuisunit toqqarneqartut, imm. 2 naapertorlugi, Aningaasaqarnermut Naalackersuisoqarfimmeersunit marlunnit aamma Aningaasaqarnermut Sulisoqarnermullu Aqutsisoqarfimmi isumaqatiginninniartarnermut immikkoortortaqqarfimmit ilaasortanit marlunnit avineqarsinnaapput.

Imm. 5. Isumaqatiginninniartarnermut Isumaqatigiissuteqarnermullu Ataatsimiisitalimi ilaasortat tamarmik ataatsimik sinniisussaannik toqqaasoqassaaq. Taassuma saniatigut Naalackersuisut aam-



ma kommunit Isumaqatiginninniarnermut Isumaqatigiissutinullu Ataatsimiisitaliami aalajangeeqataasinnaanatik peqataasussanik marlunnik toqqaasinnaapput.

Imm. 6. Isumaqatiginninniarnermut Isumaqatigiissuteqarnermullu Ataatsimiisitaliap suliassaa tassaavoq, Naalakkersuisut kommunillu sulisuisa akissarsiatigut atorfinitsitaanermullu tunngasutigut ineriartornerup malinnaaffiginissaa kiisalu taakkua iluanni sulianut nalinginnaasunut suliarineqartunut tamakkiisumik ilisimasaqarnissaq.

Imm. 7. Isumaqatiginninniarnermut Isumaqatigiissutinullu Ataatsimiisitaliami ilaasortat minnerpaamik qaammatit sisamakkaarlugit ataatsimiittassapput. Ataatsimiinnerit nalunaarasuartaateqarnermi atortorissaarutit atorlugit ingerlanneqarsinnaapput.

Imm. 8. Isumaqatiginninniarnermut Isumaqatigiissutinullu Ataatsimiisitaliap Naalakkersuisut kommunillu sinnerlugit makku pillugit Naalakkersuisunut inassuteqarsinnaavoq:

- 1) Isumaqatiginninniarnissamut pisinnaatitsissummi sulinissamut tunngavigineqartut § 2, imm. 2-mi taaneqartut.
- 2) Naalakkersuisut pisinnaatitsissutaat § 2, imm. 2-mi killissarititaasut iluini taaneqartut isumaqatiginninniarnissamut pisinnaatitsissutissatut sulinissami tunngavigineqartut.
- 3) Sulinermi pissutsinik pineqaatissiinissamik aallarnisaaneq kiisalu
- 4) isumaqatigiissummi matumani tunngaviusumik apeqqutit.

Imm. 9. Isumaqatiginninniarnermut Isumaqatigiissutinullu Ataatsimiisitaliap aamma Naalakkersuisunut kommuninullu oqaaseqaateqarsinnaavoq.

Imm. 10. Naalakkersuisuni kommuninilu sulisut akissarsiaqartitaanerannut atorfeqartitaanerannullu apeqqutit tunngaviusut Isumaqatiginninniartarnermut Isumaqatigiissutinullu Ataatsimiisitaliap oqaaseqaqqullugu saqqummiussiffiginnaavaa.

Imm. 11. Isumaqatiginninniartarnermut Isumaqatigiissutinullu Ataatsimiisitaliap suliai isertuunneqassapput ataatsimiisitaliallu ataatsimiinnerini aalajangiinerit Kalaallit Nunaanni Pinerluttuleri-nermut Inatsimmi nr. 306-imi 2008-meersumi § 50 naapertorlugu oqaatigineqaqqusaanngillat.

## § 5

§ 2-mi, imm. 2-mi killiliussani isumaqatiginninniarnarit taaneqartut sulinermi tunngaviusussat mallittarisassat uku naapertorlugit piareersarneqarlutillu ingerlanneqassapput.

*Imm. 2.* Isumaqatigiissutitut ataatsimoortunut isumaqatiginninniarnissanut piginnaatitsissutitut saqqummiussissutit kommunini sulisunut tunngassuteqartut Isumaqatiginninniarnermut Isumaqatigiissuteqarnermullu Ataatsimiisitaliami akuerisassanngorlugit saqqummiunneqassapput. Isumaqatiginninniarnermi inaarutaasumik angusaq isumaqatigiissutigineqassaaq kommunip akuersinissaa sillimmartaarfigalugu.

*Imm. 3.* Imm. 2-mi taaneqartutut kalaallit kommuniisa isumaqatiginninniarnissami inissisimanissaat pillugu siunnersuutaat saqqummiussassap suliarinnginnerani pissarsiarineqassapput. Inaarutaasumik piginnaatitsissutip suliarinerani Isumaqatiginninniartarnermut Isumaqatigiissutinullu Ataatsimiisitaliamit aamma Naalakkersuisut ingerlaavartumik isumaqatigiinniarnermut aalajangigassatut siunnersuutaat salliutinneqassapput. Isumaqatigiissutitut ataatsimoortunut kommunit sulisuinut tunngassuteqartunut atatillugu kommuni Isumaqatiginninniartarfiup isumaqatiginninniarnernut atatillugu illersortimik ataatsimoorussamik sinniisussamik toqqaasinnaavoq.

*Imm. 4.* Naalakkersuisut sapinngisaq tamakkerlugu tunngaviusumik apeqqutit ataatsimoortumik isumaqatiginninniarnernerup nalaani pilersut isumaqatigiissutinullu kommunip illersuisutut peqataaffinngisai pillugit kommunit oqaaseqaataannik pissarsiniartassapput. Tamanna aamma sulinermi saqitsaassuteqarnermut atatillugu sulianik aallartitsinerne, isumaqatigiissitsiniarnerni il.il. isumaqatigiissutini taamaallaat Naalakkersuisuni sulisunut attuumassuteqartunut atuuppoq.

*Imm. 5.* Tunngaviusumik suliat ataasiakkaat imm. 4 naapertorlugu Isumaqatiginninniartarnermut Isumaqatigiissutinullu Ataatsimiisitaliami suliarineqartassapput.

## § 6

Piffissami isumaqatigiissutip atuuffiani apeqqutit paasinninnermut aamma apeqqutit pillugit aalangiinerit Naalakkersuisunut kommuninullu pingaarutillit, takuuk § 4, imm. 8, nr. 4 naapertorlugu Isumaqatiginninniartarnermut Isumaqatigiissutinullu Ataatsimiisitaliamut saqqummiunneqartassapput.



## § 7

Isumaqatigiissut qaammatit pingasut sioqqullugit januaarip aallaqqaataanut atorunnaarsinneqarsinnaavoq. Atorunnaarsitsisoqassappat nutaamik isumaqatigiissuteqartoqarnissaata tungaanut isumaqatigiissut atuutissaaq.

Imm. 2. Kommunit immikkoortillugit avissaartinneqarnerini Isumaqatiginninniarnermi Isumaqatigiissutinullu Ataatsimiisitaliami inissat amerlineqassanngillat. Kommunit immikkoortutut avissaartinnerini ataatsimoorlutik siniisussarsiornissartik akisussaaffigaat.

Imm. 3. Isumaqatigiissutip matuma nutarternissaa 1. marts 2021-utinnagu anguniarneqassaaq.

Imm. 4. Kalaallit Nunaanni Namminersornerullutik Oqartussani kommuninilu sulisut akissarsiaqartitaanerannut atorfeqartitaanerannullu atatillugu isumasioqatigiinnissaq ataqatigiissaarinissarlupillugit isumaqatigiissut 5. marts 2003-meersoq atorunnaarpoq .

Imm. 5. Namminersorlutik Oqartussat kommunillu akornanni piginnaatitsinermik agguaanermik killilersuinissaq § 3 naapertorlugu ataatsimiititaliamit aalajangersarneqassaaq.

Imm. 6 Isumaqatigiissutip matuma, kommunit aqunneqarnerat pillugu inatsimmi atuuttumi § 68 naapertorlugu KANUKOKA'p piginnaasai annikillisinngilai.

Nuuk, ulloq

Kalaallit Nunaanni Kommuneqarfiit sinnerlugit:

\_\_\_\_\_  
Kommune Kujalleq

  
\_\_\_\_\_  
Kommuneqarfik Sermersooq


\_\_\_\_\_  
Qeqqata Kommunia

\_\_\_\_\_  
Qaasuitsup Kommunia

Kalaallit Nunaanni Kommuneqarfiit nuna tamakkerlugu peqatigiiffiat sinnerlugu, KANUKOKA:

  
\_\_\_\_\_  
KANUKOKA

Naalackersuisut sinnerlugit

  
\_\_\_\_\_  
Aningaasaqarnermut Aatsitassahullu Naalackersuisoq

J. nr.

15.20.02

Qupperneq 6 quppernertit 7

17. november 2016 - 16:36



Ilanngussaq 1:

Suliffeqarfiit Kalaallit Nunaanni Namminersorlutik Oqartussat ataaniittut ulloq 1. september 2016 isumaqatigiissutip matuma ataaniittut:

- a) Nukissiorfiit
- b) Asiaq
- c) Mittarfeqarfiit
- d) KNR

Akissarsiat ineriartornerat malinnaaffiginiarlugu isumaqatigiisummilu § 1 eqqortinniarlugu, tamatumat saniatigut Isumaqatiginninniarnermut Isumaqatigiissutinullu Ataatsimiititaliaq pisortat ingerlatseqatigiiffiiniq, soorlu assersuutigalugu Royal Greenlandimik aamma TelePostimi misissuinsaanut periarfissinneqarpoq.